
ЭКОШАҲАРДА ҚУРИЛИШ ИШЛАРИ ЖАДАЛЛАШТИРИЛАДИ

Вилоят ҳоқими Хайрулло Бозоров, вилоят секторлари раҳбарлари билан Фарғона шаҳрида барпо этилаётган Экошаҳарда – “Янги Ўзбекистон” массивида бўлиб, қурилиш ишларининг бориши билан танишди.

Вилоят марказида 300 гектар майдонда 40 минг аҳолига мўлжалланган йўлдош шаҳарчани бунёд этиш ишлари жадал амалга оширилмоқда. Жорий йил 28 январда илк котлован қозиш ва пойдевор учун бетон қуйиш ишлари бошланган Экошаҳарда бугунги кунда 69 та кўп қаватли турар-жой қад ростламоқда. Шу билан бирга, иккита мактаб, иккита мактабгача таълим муассасаси, битта шифохона, 4000 ўринли амфитеатр қурилиш ишлари ҳам давом этмоқда.

Экошаҳарга электр таъминоти, сув, канализация тармоқлари тортиш ишлари якуний босқичга кирди. Худудда сунъий кўл барпо этиш ишлари ҳам жадал олиб борилмоқда.

Хайрулло Бозоров масъуллар билан суҳбатлашиб, ҳар бир объект бўйича қурилиш ишларининг боришини бирма бир жойида муҳокама қилди.

Айрим объектларда қурилиш жараёнларининг суст олиб борилаётганини танқид қилган вилоят ҳоқими, белгиланган режа-графикка мос равишда ишларни жадаллаштириш, ишчи-ходимларни кўпайтириш ва яхши иш ташкил қилган қурувчиларни қўллаб-қувватлаш кераклигини таъкидлади. Баъзи тадбиркорларнинг қурилиш ишларини тезлаштириш учун банк кредити олишга кўмаклашиш бўйича мурожаатлари ижобий ҳал этиладиган бўлди.

Экошаҳар худудида ташкил этилаётган 70 гектарлик “Янги Ўзбекистон” боғини кўздан кечирган вилоят ҳоқими, дарахтлар орасига кузги-қишки мавсумда қўшимча равишда сифатли кўчатлар экиш вазифасини юклади.

Қурилиш жараёнларида меҳнат муҳофазаси ва техника хавфсизлиги талабларига амал қилишни таъминлаш бўйича мутасаддиларга ҳамда қурилиш фирмалари раҳбарларига қатъий кўрсатма берилди.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2022-11-01 22:47:04